



2023-4

13. juni 2023

All. nr./brevnr.:

2022-104-0043

Sull./sagsbeh.: MS/jh

**Avannaata Kommuniata suliamik suliarinninnginnera piffis-
sap suliamik suliarinninnermut atorneqartup ukiut sisamat
sinnerlugit sivilisussuseqarneranik kinguneqarpoq**

Innuttaasup (matuma kingornatigut A-mik taaneqartartussap) Avannaata Kommuniani (matuma kingornatigut kommunimik taaneqartartussami) siusi-naartumik pensionisiaqalersinneqarnissani 3. august 2018-imi qinnutigaa. Nakorsap uppersaasiussaa qinnuteqaatip suliarineqarnerani atugassaq 9. august 2018-imi suliarineqarpoq. Nakorsalli uppersaasiussaa ingerlateqqillugu immikkoortortaqarfimmut susassaqartumut nassiunneqanngitsoorpoq.

A-p kommuni akissuteqaqqullugu 16. december 2021-mi aamma 27. december 2021-mi nukingisaarpaa. Kommunip A taassuma nukingisaarutai tunngavigalugit 27. december 2021-mi ataatsimeeqatigaa, suliamilli suliarinninnermi iliuuserpiaasunik aallartitsinani.

A-p kommuni 9. september 2022-mi nukingisaaqqippaa, taamaattumillu kommunip A 22. september 2022-mi ataatsimiinnissamut aggeqquaa.

Piffissaq kommunip suliamik suliarinninnerminut atugaa A-p uannut 4. oktober 2022-mi naammagittaalliuutigaa.

Kommunip A tamatuma kingornatigut arlaleriarluni ataatsimeeqatigisarpaa, nakorsallu uppersaasiussaa nutaaq 8. december 2022-mi suliarineqarluni. Sulisinnaassuseqarnermut takussutissiaq 3. januar 2023-mi suliarineqarpoq.

A-p siusinaartumik pensionisiaqalerumalluni qinnuteqaatini 16. marts 2023-mi tunuartippaa.

Ombudsmandi isumaqarpoq suliaq A-mut tunngasoq kommunip arlaleriarluni puigortarsimagaa kiisalu A aatsaat nukingisaaruteqaraangat suliami iliuuseqartoqartarsimasoq.

Suliap attorneqarani ukiut pingasut sinnerlugit uninngatinneqarsinnaasimane-ra kiisalu suliap suliarineqannginneranik kommunip nukingisaarutinik tigusaqarnermi kingornatigut aatsaat malugisaqarsimanera Ombudsmandip isorisariaqarluinnartutut isigaa.

Piffissaq suliamik suliarinninnermut atorneqartoq katillugit ukiut sisamat sinnerlugit sivissuseqartoq Ombudsmandip isorisarialerujussuartut isigaa.

(Oqaaseqaat 13. juni 2023-meersoq, j.nr. 2022-104-0043)

Tamatuma kingornatigut imatut oqaaseqaateqarpunga:

1. Suut misissorpakka?

1.1. Piffissaq A-p siusinaartumik pensionisiaqalerumalluni qinnuteqaataanik suliarinninnermut kommunip atugaa suliamik uanga suliarinninninni isummerfiginiallugu aalajangerpunga.

Naammagittaalliuutip suliarineqarnissaa Isumaginninnermi Naammagittaalliuuteqartarfiup 7. januar 2022-mi itigartitsissutigaa, Isumaginninnermimi Naammagittaalliuuteqartarfik taamallaat suliat kommunit aalajangiiffigineqarsimasut suliarinissaannut pisinnaatitaammat. Piffissaq kommunip suliamik suliarinninnerminut atugaa pillugu Isumaginninnermi Naammagittaalliuuteqartarfimmut naammagittaalliorqarsinnaanerani kommunip kukkulluni ilitersuisimanera oqaaseqaammi matumani isummerfiginngilara.

Siusinaartumik pensionisiaqarnerup saniatigut saniatigooralugu isertitaqarsinnaaneq pillugu kommunip ilitersuisimannginnera aammattaq isummerfiginngilara.

Kiisalu A-p nukingisaarutaanut kommunip qisuariarnera naammassimanersoq isummerfiginngilara.

Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi § 14, imm. 1 innersuussutigaa, tassuunalu aalajangersarneqarpoq naammagittaalliuut misissuinermik aallartitsinermut pissutigissallugu naammannersoq Ombudsmandip aalajangissagaa.

1.2. Ajornartorsiutinik taamaattunik siusinnerusukkut nammineq suliarinnissimangikkaangama Danmarkimi atuakkiaasimasut aamma Folketingip Ombudsmandiata periaasia oqaaseqaatinni arlalitsigut aallaavigisarpakka. Kalaallit Nunaanni inatsiseqartitsinikkut tunngaviup Danmarkimilu inatsiseqartitsinikkut tunngaviup pingaarnerusutigut assigiinnerat tamatumunnga pissutaavoq. Kalaallit Nunaanni inatsiseqartitsinikkut tunngavik Danmarkimi inatsiseqartitsinikkut tunngavimmit allaasoq isumaqaraangama tamanna oqaatigisarpara.

Oqaaseqaatiga imatut tulleriinnilerneqarpoq:

- Immikkoortoq 2. Suliaq pillugu naatsumik oqaatigisassat
- Immikkoortoq 3. Inatsiseqartitsinikkut tunngavigisaq
- Immikkoortoq 4. Kommunip isumaa
- Immikkoortoq 5. Uanga naliliinera

Oqaatigaara suliap ingerlasimanerata allaaserineqarnera oqaaseqaammut tulliummat.

2. Suliaq pillugu naatsumik oqaatigisassat

A 2012-imit 2017-imut siusinaartumik pensionisiaqarsimavoq. A-p siusinaartumik pensionisianik tunineqartarunnaarnissani 15. juni 2017-imi qinnutigisimavaa.

A siusinaartumik pensionisiaqaleqqikkumalluni 3. august 2018-imi qinnuteqarpoq.

Nakorsap uppersaasiussaa A-p siusinaartumik pensionisiaqalerumalluni qinnuteqaataata suliarineqarnerani atugassatut 9. august 2018-imi suliarineqarpoq.

Suliami killiffik paasiumallugu A-p kommunimut 16. december 2021-mi aamma 27. december 2021-mi nukingisaarutigisarsimavaa.

Kommunip A 27. december 2021-mi ataatsimeeqatigaa. Suliami nalunaarsuiffimmi allatamit erserpoq nakorsap uppernarsaasiussaa 9. august 2018-imeersaq kommunip immikkoortortaarfimmut susassaqtumut ingerlateqqillugu nassius-simanngikkaa. Suliami nalunaarsuiffimmi allatamit tassannga taamatutaaq erserpoq nakorsap uppernarsaasiussaata nutaap pissarsiariniarneqarnissaa pisa-riaqartinneqartoq kommunip A-mut paasissutissiissutigisimagaa. A-p tamatumunnga atatillugu oqaatigaa nakorsap uppernarsaasiussaata 2018-imeersup kommunimit atorineqarnissaa kissaatigigini. Suliami nalunaarsuiffimmi allatamit aammattaaq erserpoq Isumaginninnermi Naammagittaalliuuteqartarfimmut naammagittaalliornissamut periarfissaqarnera kommunip A-mut ilitsersuutigisimagaa. Kommunip A-mut tamatumunnga atatillugu oqaatigaa nakorsap uppernarsaasiussaa nutaap Naammagittaalliuuteqartarfiup suliamik naammassinnilluni suliarinnereerneratigut pissarsiariniarneqarnissaanut aatsaat piffissaqarsinnaalissasoq.

A-p piffissaq kommunip suliamik suliarinninnerminut atugaa pillugu naammagittaalliuutaata suliarineqarnissaa Isumaginninnermi Naammagittaalliuuteqartarfiup 7. januar 2022-mi itigartitsissutigaa, Isumaginninnermimi Naammagittaalliuuteqartarfiik taamaallaat sulianik kommunip aalajangiiffigisimasaanik suliarinnissaminut pisinnaatitaammat.

Suliami nalunaarsuiffimmi allatamit 3. maj 2022-meersumit erserpoq A-p siusi-naartumik pensionisiaqalerumalluni qinnuteqaataa kommunip suliatut nutaatut suliariniaraa. Suliami nalunaarsuiffimmi allatamit tassannga aammattaaq erserpoq suliamik suliarinnittup A attaveqarfiginiarsarisimagaluaraa, iluatsissimanaguli.

Suliami killiffik paasiumallugu A-p kommunimut 9. september 2022-mi nukingisaarutigisimavaa.

Kommunip A 22. september 2022-mi ataatsimeeqatigiumallugu aggeqqusimavaa. A ataatsimiinnermut tassunga takkussimangilaq.

Piffissaq kommunip suliamik suliarinninnerminut atugaa A-p uannut 4. oktober 2022-mi naammagittaalliutigaa.

A kommunimut 22. november 2022-mi allappoq suliap nakorsamit uppernarsaasiussaq 2018-imeersoq tunngavigalugu suliarineqarnissaa kissaatigigini kiisalu nakorsap uppernarsaasiussaaniq nutaamik pissarsiniartoqarnissaa akerlerigini.

Kommunip A 24. november 2022-mi aamma 28. november 2022-mi ataatsimeeqatigisimavaa. Suliami nalunaarsuiffimmi ataatsimiinnerit taakku tunngavigalugit allattukkanit erserpoq nakorsap uppernarsaasiussaaniq nutaamik pissarsiniarnissap pisariaqartinneqarnera kommunip A-mut paasissutissiissutigisimagaa. Nakorsap uppernarsaasiussaata 9. august 2018-imeersup ingerlateqqillugu immikkoortortaqaqarfirmut susasaqartumut nassiunneqarsimanginnera kommunip 28. november 2022-mi ataatsimiinnermi ajuusaarutigisimavaa.

Nakorsap uppernarsaasiussaa nutaaq A-p siusinaartumik pensionisiaqalerumalluni qinnuteqaataata suliarineqarnerani atugassaq 8. december 2022-mi suliarineqarpoq.

A siusinaartumik pensionisiaqalerumalluni 15. december 2022-mi qinnuteqaqqippoq.

Kommunip A 3. januar 2023-mi ataatsimeeqatigaa, tasanilu sulisinnaassuseqarnermut takussutissiaq suliarineqarluni.

Suliami nalunaarsuiffimmi allatamit 19. januar 2023-meersumit erserpoq kommunip A suleqatigiuminaatsikkaa, taassumani Majoriamut nuunnissani kissaatiginnimmagu.

Kommunip A 26. januar 2023-mi ataatsimeeqatigaa. Suliamik suliarinnittup ataatsimiinnermi tassani oqaatigaa siusinaartumik pensionisiat 50 %-iinik aalisarsinnaanermut 50 %-imik akuersissummik ilaqartillugu tunniussinissamut pe-

riarfissaqanngitsoq. Suliami nalunaarsuiffimmi allatamit tassannga erserpoq suliaq 2023-mi februarimi uterfigeqqinniarlugu suliamik suliarinnittup A-mut isumaqatigiissutigisimagaa.

A-p siusinaartumik pensionisiaqalerumalluni qinnuteqaatini 16. marts 2023-mi tunuartippaa.

A-p sulisuma ilaannik oqarasuaatikkut 4. maj 2023-mi oqaloqateqarnermini oqaatigaa siusinaartumik pensionisiaqalerumalluni qinnuteqaatini tunuartikkaluarlugu naammagittaalliutimi uannit suliarineqarnerata ingerlaqqinnissaa kissaatigigini.

3. Inatsiseqartitsinikkut tunngavigisaq

3.1. Piffissaq suliamik suliarinninnermut atorneqartoq

Siusinaartumik pensionisiaqarsinnaatitaaneq siusinaartumik pensionisiat pillugit Inatsisartut inatsisaatigut nr. 40-kkut, 9. december 2015-imeersukkut (matuma kingornatigut siusinaartumik pensionisiat pillugit inatsimmik taaneqartartussakut) aamma siusinaartumik pensionisiat pillugit Namminersorlutik Oqartussat nalunaarutaatigut nr. 15-ikkut, 30. juni 2016-imeersukkut (matuma kingornatigut siusinaartumik pensionisiat pillugit nalunaarummik taaneqartartussakut) aalajangersaavigineqarpoq.

Siusinaartumik pensionisiaqalersitsisoqarnissaanik aalajangiisoqarsinnaalinnginnerani suliamut atatillugu periarfissat tamarmik aallaavittut misissorneqarsimasussaapput, qinnuteqartup sulisinnaassutsi ateqqissinnaaneraa qulaajarniarlugu. Tamanna siusinaartumik pensionisiat pillugit inatsimmi § 8, imm. 1-ikkut aalajangersarneqarpoq.

Siusinaartumilli pensionisiaqalerumalluni qinnuteqaatit qanoq pilertortigisumik suliarineqartassanersut imaluunniit inuup sulisinnaassuseqarnerata qulaajarneqarnera qanoq sivisutigisumik ingerlasarnissaa siusinaartumik pensionisiat pillugit inatsimmi nalunaarummiluunniit takuneqarsinnaanngilaq.

Siusinnerusukkut oqaaseqaammi naliliivunga suliat qinnuteqartup siusinaartumik pensionisiaqarsinnaatitaaffigisaatut erseqqissut sivilunerpaamik qaammatini pi-

ngasuni suliarineqartariaqartut. Suliart qinnuteqartup siusinaartumik pensionisia-qarsinnaatitaanerata erseqqinngiffii eqqarsaatigalugit naliliivunga piffissaq suliarmik suliarinninnermut atorineqartoq sivilsunerusinnaasoq. Oqaaseqaatiga 2005-11.73-88.1 innersuussutigaa.

Piffissaq oqartussaasut sulianik suliarinninnerminnut atortagaat pillugu ataatsimut malittarisassanik pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8-mi, 13. juni 1994-imeersumi (matuma kingornatigut suliassat suliarineqartarnerat pillugu inatsimmik taaneqartartussami) inatsisiniluunniit allani aalajangersaasoqarsimanngilaq. Nalinginnaasumik naatsorsuutigineqarpoq suliart sapinngisamik pilertornerpaamik, pisariinnerpaamik, aningaasartuutaannginnerpaamik illersorneqarsinnaanerpaamillu suliarineqarnerat ingerlatsinerimi ileqqorissaarnerup nassatarigaa.

Namminersornerullutik Oqartussat Inatsisileriffiata suliassat suliarineqartarnerat pillugu inatsit pillugu ilitersuusuaanni december 1994-imeersumi imm. 199-imit aamma 204-mit makku aammattaaq erserput:

“**199.** Suliassat tamarmik pisortat ingerlatsiviini suliarineqartut soorunami sapinngisamik pisariitsumik, pilertortumik aningaasartuutaavallaanngitsumillu suliarineqartarnissaannik piunasaqaat pingaartumik atuuppoq suliassanut inuit ataasiakkaat imaluunniit namminersorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni.

[...]

204. Suliassat suliarineqartarnerat pillugu inatsit suliassat qanoq sivilsutigisumik suliarineqartarnissaat pillugu nalinginnaasunik aalajangersagartaqanngilaq. Tamatumunga ilaatigut pissutaavoq suliassat pisortat ingerlatsiviinit suliarineqartartut assigiinneqimmata assigiinneqisunillu annertussuseqartarlutik, taamaattumik inatsisikkut pisortat ingerlatsiviini qanoq sivilsutigisumik suliarineqartarnissaasa aalajangersimasumik malittarisassiornissaat ajornarluinnartussaalluni, tassa eqqartuussivinni ajornarpallaanngitsumik atortinniarneqarsinnaasunik.

Kisiannili Folketingip Ombudsmandiata oqaaseqaatigisartagai tunngavigalugit nalinginnaasumik ingerlatsinerimi ileqqorissaarnerup malinniarneqarnissaani suliassat qanoq

sivisutigisumik suliariniarneqartarnissaat pillugu malittarisassaqartitsisoqarpoq, matuma ataani suliamut tunngassuteqartup suliap qanoq sivisutigisumik suliarineqassanngatinneqarneranik ilisimatinneqartarnissaa ilanngullugu.

Ombudsmandip aammattaaq aalajangikkat ilaanni tikkuavigisarsimavaa suliat siviisuumik aalajangiivigineqaratik uninngatinneqartarnissaat pinaveersaarniarlugu kiisalu puigortoorneqarlutik aalajangiivigineqanngitsoortarnissaat pinaveersaarniarlugu oqartussaasut naammattumik *atorsinnaalluartunik suliat uterfigeqqinneqartarnissaannut allattuiffiliortarnissaat.*"

Taamaalilluni suup piffissatut suliamik suliarinninnermut atorneqartutut naammaginartumik sivisussuseqartutut isigineqarsinnaaneranik apeqqut ataatsimut akineqarsinnaanngilaq, suliali ataasiakkaarlugit pisumi naliliiviginninnermik tunngaveqarluni.

Tamatuma saniatigut oqartussaasoq suliamik pisariaqarneratut pilertortigisumik suliarinnissimansoq naliliinnermi piffissaq suliamik suliarinninnermut atorneqartoq tamarmiusoq pissutsillu allat ilanngullugit isiginiarneqartariaqarput. Soorlu suliami illua'tungiusup pilertortumik aalajangiisoqarnissaanik pisariaqartitsinera soqutigisaqartuuneralu, suliap pissusia, ajornakusuussusia, misissuinerit oqartussaasup ingerlattariaqagaasa annertussusiat piffissarlu oqartussaasup suliani assingusuni suliarinninnerminut atortagaa.

Oqartussaasumut aqutsinnermi allaffissornikkut aningaasaqarnikkullu atugassiisutit piffissamik oqartussaasup suliamik suliarinninnerminut atugaanik naliliiviginninnermi pingaartillugit aallaavittut isiginiarneqarsinnaanngillat. Taamaattumik suliffiit soorlu napparsimasoqarnera, feriartoqarnera, pikkorissartoqarnera aamma aqutsinnermi allaffissornikkut aningaasaqarnikkullu amikkisaarneq pissutigalugit inuttaqanngikkallartut piffissap suliamik suliarinninnermut atorneqartup sivitsuuttoorneranut pissutaatinneqarsinnaagajunngillat.

Oqartussaasut eqqaasitseriaatsinik naammattumik pitsaassuseqartunik suliat aalajangiisoqannginnerani piffissami sivisunerusumi uninngatinneqartannginnissaanik sulialluunniit puigorneqartannginnissaanik qulakkeerinneqataasunik pilersitsisariaqarput. Suliamik suliarinninnerup unittuunnginnissaa oqartussaasup aammattaaq qulakkeertariaqarpaa.

Oqartussaasup piffissaq sulianik suliarinninnermut atornerqartoq nalinginnaasoq qaangeruniuk imaluunniit oqartussaasup qaqugu aalajangiisoqarnissaanik naatsorsuutigisamik siusinnerusukkut nalunaarutigisimasani qaangeruniuk suliami sooq suli aalajangiisoqarsimanginneranik suliami illua'tungiusumut nammineq suliniuteqarnermigut ilisimatitsisussaanaera ingerlatsinermi ileqqorissaarneq pillugu tunngaviit nassataraat.

Oqartussaasup qaqugukkut aalajangiinissaata naatsorsuutigineqarnera eqqoq-qissaartumik nalunaarutigineqassasoq piumasaqaataangilaq. Oqartussaasulli suliap paasisutissat pigineqartut, suliap pissusia il.il. aallaavigalugit inaarlugu qaqugu suliarineqarumaarnissaanik naatsorsuutiginninneranut piffissaliussisariaqarnera ingerlatsinermi ileqqorissaarnerup nassataraa.

Suliani arlalinni piffissaq oqartussaasut sulianik suliarinninnerminnut atortagaat pillugu oqaaseqaateqartarpunga. Taamaattumik ilaatigut suliaq 2011-mi ukiu-moortumik nalunaarutinni immikkoortutut 5.7.1-itut ilanngunneqartoq kiisalu suliaq 2005-imi ukiu-moortumik nalunaarutima qallunaatuuani quppernemi 56-imi tullianilu aamma kalaallisuuani quppernermi 69-imi eqqartorneqartoq innersuussutigaakka. Suliaq taaneqartoq kingulleq Ombudsmandeqarfimmi periaatsimut pisoqaanerungaatsiartumut innersuussutinik imaqarpoq. Suliaq 2018-3 nit-tartakkanni tamanut saqqummiunneqartoq aammattaaq innersuussutigaara.

Piffissaq pisortani oqartussaasut sulianik suliarinninnerminnut atortagaat pillugu piumasaqaatit Danmarkimi inatsisilerineq pillugu atuakkiaasimasuni allaaserineqarnerat naggasiutitut innersuussutigaara, matumani Niels Fengerip allallu atuakkiaanni "Forvaltningsret"-imi (2018-imeersumi) quppernerit 688 tulliiilu aamma Hans Gammeltoft-Hansenip allallu atuakkiaanni "Forvaltningsret"-imi aappasaanik (2002-mi) naqitertinneqartumi quppernerit 903 tullialu ilanngullugit eqqarsaatigalugit.

4. Kommunip isumaa

Kommunip uannut oqaaseqaammimi 29. november 2022-meersumi ilaatigut makku oqaatigai:

“[...]

Avannaata Kommuniata oqaatigisinnaavaa [A] siusinaartumik pensionisianik qinnuteqaamminik tunniussereersoq kommuni piffissami sivilunerusumi sulisussaaleqingaatsiarsimasoq, soorluttaaq immikkoortortaqaarfimmi, qinnuteqaatip taamani sumiiffigisaani, piffissap ilaani pisortamik atorfinitsitsisoqarsinnaasimanngitsoq.

Avannaata Kommuniata siusinaartumik pensionisiat pillugit suliat suliarineqartarnerat piffissami aalajangersimasumi Majoriamut aammattaaq nuussimavaa, taamaaliornikut sulianik ingerlatsinerup ingerlalluarnernissaa kommunip neriuutigalugu. Taamaattoqanngimmalli sulianik ingerlatsinermik akisussaaffik kommunip nammineq allaffianut utertinneqarpoq.

Suliaq [A-mut] tunngasoq tassunga atatillugu takunngitsoorneqarsimassasoq Avannaata Kommuniata ilimagaa. Pissutaaqqissaartulli suussusersinissaanut periarfissaqarsimanngilaq.

Avannaata Kommunian suleqatigiissitamik immikkut ilisimasalinnik inuttalimmik maanna pilersitsisimalerpoq, sulianik siusinaartumik pensionisianut, tamatumani nalileeqqinnerit ilanngullugit eqqarsaatigalugit, tunngassutilinnik suliaqartumik.

[A-p] qinnuteqaataata piffissami sivilunerusumi suliarineqarsimannginna Avannaata Kommunianit sakkortunerpaamik ajuusaarutigineqarpoq.

Avannaata Kommuniata suliaq maanna ingerlappaa.

Ombudsmandip allagaani 13. oktober 2022-meersuni takuneqarsinnaasutut [A] 22. september 2022-mi ataatsimeeqatigiinnissamut aggersarneqarsimavoq, takkunnanili.

Nakorsamit oqaaseqaammik nutaamik pissarsiniarnissaq siunertaralugu 24. november 2022-mi ataatsimeeqatigiinnissamut aggersarneqaaqqippoq, tamatumunngalu akuersilluni.

[A] aammattaaq 28. november 2022-mi oqaloqatigiinnissamut aggersarneqarpoq, tamatumani siusinaartumik pensionisiat pillugit Inatsisartut inatsisaat nr. 40, 9. december 2015-imeersoq kingusinnerusukkut allannguuteqartinneqartoq naapertorlugu suliami qanoq alloriarloqaaqqinnissaa pillugu ilisimatinneqarluni. Ukiuni kingullermi pingasuni inaarummik naatsorsuutinik nassaqquneqarsimavoq. Tamatumunnga taar-

siullugu siumoortumik naatsorsukkat, suliami allattukkanut suliamilu ilanngussanut al-
lanut ilanngullugit nassiunneqartut, nassarpai. Pissutsit taamaannerat paasilluarpaa
suliallu ingerlateqqinnissaani suleqataanissamut piareersimalluni.

Innuttaasup sulisinnaassusia maanna misissorneqassaaq suliamilu ingerlariaqqinnis-
samut pisariaqartinneqartut suliarineqassallutik.

Suliap maannamut ajusaarnartumik arriitsorujussuarmillu ingerlasimanera Avanna-
ta Kommuniata ajuusaarutigeqqippaa.” (Ombudsmandeqarfimmi nutsigaavoq)

Kommunip uannut oqaaseqaammini 21. februar 2023-meersumi ilaatigut makku
oqaatigai:

“[...]

[A-p] siusinaartumik pensionisiaqalersinneqarnissaa eqqarsaatigalugu aalajangisoqar-
nissaata qaqugu pinissaa Avannaata Kommuniata massakkut ajoraluartumik paasissu-
tissiissutigisinnaanngilaa.

Nassiussinerup kingulliup kingornatigut suliami allattuiffiup naqitanngortinneqarnera
kiisalu suliami allattuiffimmi ilanngussat taaneqartut Avannaata Kommuniata kakkiul-
lugit nassiuppai. Tassannga ersertutut suliaq kommunip ingerlaavartumik suliaraa, su-
liamillu suliarinninneq inatsimmi piumasarineqartutut ingerlallugu. Oqaatigineqassaaq
[A] – 2012-imit 2017-imut – siusinaartumik pensionisiaqareersimagaluartoq nalilee-
qittoqartussaasoq, siusinnerusukkummi nalileeqqittoqarsimangimmat, inatsisimmi a-
tuutilernerani suli 60-inik ukioqalersimangimmat, tak. siusinaartumik pensionisiat pil-
lugit Inatsisartut inatsisaanni nr. 40-mi, 9. december 2015-imeersumi kingusinneru-
sukkat allannguuteqartinneqarsimasumi § 43.

[...]

Ukiut marluk qaangiunneranni, tassalu 16. december 2021-mi, [A] siusinaartumik
pensionisiat pillugu isumaginninnermik ingerlatsivimmut allappoq, suliarlu apeqquti-
galugu. Suliaq suliamik suliarinnittup misissorsimagaluarpaa [A-lu] ataatsimiigiaqqusi-
magaluarlugu, suliamillu suliarinnittup [A] nalunaarfigisimavaa suliaq suliarineqarsi-
manngitsoq, aallaqqaataaniillu aallartittariaqarluni, nakorsallu uppernarsaassiussaa nu-
taa qinnutiginiarlugu. [A-li] aallaqqaataaniit aallarteqqikkumangilaq, nakorsammi
uppernarsaassiussaaq 2018-imili nassiussimammagu, [A-llu] siusinaartumik pensioni-

siaqalersinneqarnissaa kaammattuutigisimallugu. Suliamik suliarinnittup [A] ilitersorlugu oqarfigisimavaa piffissaq suliamik suliarinninnermut atorneqartoq sivisooq pillugu naammagittaalliut Naammagittaalliuteqartarfimmut nassiussinnaagaa, kaammattutigalugulu nakorsap uppersaasiussaani nutaamik pissasugut, siullermi pisoqaamat. [A-lli] suliamik suliarinnittoq suleqatigumangilaa. Mobilini tiguneq ajorpaa, aggeqquneqaraangamilu aggissanani.

[...]” (Ombudsmandeqarfimmi nutsigaavoq)

5. Uanga naliliinera

5.1. Piffissaq siusinaartumik pensionisiaqalerumalluni qinnuteqaammik suliarinninnermut atorneqartoq

5.1.1. Kommuni suliamik suliarinninnermi iliuseqannginnera

A siusinaartumik pensionisiaqalerumalluni 3. august 2018-imi qinnuteqarpoq.

Suliami allagaatini takusinnaavara kommuni nakorsap A pillugu uppersaasiussa 9. august 2018-imi tigugamiulli A-mik 27. december 2021-mi ataatsimeeqateqarnermi tungaanut suliamik suliarinninnermi iliuseqarsimangitsoq.

Tamatumunnga atatillugu oqaatigaara uanga paasisara unaasoq 27. december 2021-mi ataatsimiinneq A-p ulloq taanna kiisalu siusinnerusukkut 16. december 2021-mi nukingisaarisimaneramik pissuteqartoq.

Kommuni 27. december 2021-mi ataatsimiinnerup kingornatigut suliamik suliarinninnermi iliutsinik aallarnisaasimangitsoq suliami allagaatini takuneqarsinnaavoq.

Suliami allagaatinit erserpoq suliamik suliarinnittup A 3. maj 2022-mi arlaleriarluni attaveqarfiginiarsarisimagaluaraa, iluatsinngitsumik. Paasisara unaavoq suliamik suliarinnittoq A-mut sianertarsimasoq, taannali akisarsimangitsoq.

Kommuni A allatut iliorluni, soorlu allakkatigut aggeqqusinikkut, attaveqarfiginiarsimangikkaa A-luunniit ulluni tulliuttuni oqarasuaatikkut sianerfiginiarsimangikkaa suliami allagaatini aammattaaq takuneqarsinnaavoq.

Suliamik suliarinnittup A-mik 3. maj 2022-mi attaveqarfiginninniaraluarneranit kommunip A-mik 22. september 2022-mi ataatsimeeqateqarnissamut allakkatigut 16. september 2022-meersutigut aggeqqusisimanerata tungaanut kommuni suliamik suliarinninnermi iliuutsinik aallarnisaasimanngitsoq suliami allagaatini takuneqarsinnaavoq.

Tamatumunnga atatillugu oqaatigaara uanga naliliinera unaasoq 22. september 2022-mi ataatsimiinniarneq A-p nukingisaarutaanik 9. september 2022-meersumik pissuteqarsimasoq. Oqaatigaarattaq A 22. september 2022-mi ataatsimiinnissamut takkussimanngitsoq.

Kommuni A-p 22. september 2022-mi ataatsimiinnissamut takkutinngitsoorneranit kommunip A-mik 24. november 2022-mi ataatsimeeqateqarnerata tungaanut suliamik suliarinninnermi iliuutsinik aallarnisaasimanngitsoq suliami allagaatini takuneqarsinnaavoq.

Tamatumunnga atatillugu oqaatigaara uanga naliliinera unaasoq 24. november 2022-mi ataatsimiinneq A-p 22. november 2022-mi nukingisaarisimaneranik pissuteqartoq.

5.1.2. Kommunip sulisussaaleqinera

Kommunip uannut oqaaseqaammini 29. november 2022-meersumi oqaatigaa kommuni piffissami A-p siusinaartumik pensionisiaqalerumalluni qinnuteqaataata tiguneqarnerata nalaani ilungersunartumik sulisussaaleqisimasoq kiisalu taamani siusinaartumik pensionisianut immikkoortorta qarfik piffissami ingerlasumi pisor-taqarsimanngitsoq.

Isumaqarpunga kommunip sulisussaaleqinera immikkoortorta qarfiulluunniit pisor-taqannginnera piffissap suliamik suliarinninnermut atorneqartup pisariaqanngitsumik sivitsuloorunneqarneranut pissutaatinneqarsinnaanngitsut.

5.1.3. Kommunip A-mik suleqateqarnera

Kommunip uannut oqaaseqaammini 21. februar 2023-meersumi oqaatigaa suliap aallaqqaataaniit aallarteqqinneqarnissaa A-p kissaatiginngikkaa. Kommunip uannut oqaaseqaammini aammattaq oqaatigaa A suliamik suliarinnittumik suleqa-

teqarusunngitsoq, kommunimmi oqaatigaa A-p oqarasuaatini angallattagaq tigu-
neq ajoraa, ataatsimiinnernullu aggeqquneqarsimaffigisaminut takkunneq ajor-
toq.

Suliami nalunaarsuiffimmi allattukkamit 19. januar 2023-meersumit erserpoq su-
liamik suliarinnittup A suleqatigiuminaatsikkaa, A-mmi Majoriamut nuunnissani
kissaatiginngimmagu.

Suliami allagaatini takusinnaavara A-p kommunimit attaveqarfiginiarsarineqara-
mi oqarasuaatini taamaallaat ullormi ataatsimi, 3. maj 2022-mi, tigusarsiman-
ngikkaa. Aammattaaq takusinnaavara A ataatsimiinnermut ataasiinnarmut, 22.
september 2022-mi pisumut, takkutinngitsoorsimasoq.

Uanga naliliinera unaavoq innuttaasup oqarasuaatiminik ullormi ataatsimi tigus-
sarsimannginnera kiisalu ataatsimiinnermut aggeqqusaaffimminut ataasiarluni
takkutinngitsoorsimanera suleqatigiuminaannermik takutitsinertut isigineqarsin-
naanngitsoq. Tamatumunnga atatillugu maluginiarpara nakorsap uppernarsaa-
siussaata 2018-imeersup atorneqarnissaa kissaatigigini A-p aatsaat ataatsimiin-
nermi 27. december 2021-mi pisuni tamatumalu kingornatigut ataatsimiinnerni
oqaatigisimagaa. Taamaalilluni piffissap siusinaartumik pensionisiaqalerumalluni
qinnuteqaatip tiguneqarneranit 27. december 2021-mi ataatsimiinnerup tungaa-
nut kommunip atugaata sivilisussusia A-p suleqatiginnikkusussuseqannginneranik
tunngavilersorneqarsinnaanngilaq.

Tassani aamma ilaavoq uanga paasinninnera unaasoq kommuni siusinaartumik
pensionisiaqalerumalluni qinnuteqaammik tigusaqarnermini iliuuseqartussaati-
taasoq – qinnuteqaateqartoq suleqatikkuminaassimasinnaagaluarpalluunniit.

A-p siusinaartumik pensionisiaqalerumalluni qinnuteqaatini 16. marts 2023-mi
tunuartippaa.

5.1.4. Ataatsimut naliliineq

Ataatsimut isiginnillunga isumaqarpunga suliaq A-mut tunngasoq kommunip ar-
laleriarluni puigortarsimagaa kiisalu A aatsaat nukingisaaruteqaraangat suliami
iliuuseqartoqartarsimasoq.

Suliap attorneqarani ukiut pingasut sinnerlugit uninngatinneqarsimanera kiisalu suliap sularineqannginneranik kommunip qinnuteqaateqartumit nukingisaarutiniq tigusaqarnermi kingornatigut aatsaat malugisaqarsimanera isorisariaqarluinnartutut isigaakka.

Piffissaq suliamik sularinninnermut atorneqartoq katillugit ukiut sisamat sinnerlugit sivilissuseqartoq isorisarialerujussuurtut isigaara.

Maluginiarpara A-p siusinaartumnik pensionisiaqalerumalluni qinnuteqaatimi tunuurtinnissaa toqqarsimagaa.

Kommunip oqaaseqaammi 29. november 2022-meersumi oqaatigaa suliat ingerlasarnerat allanngortissimagini kiisalu kommuni sulianik ilisimasaleqatigiikkuaanik siusinaartumnik pensionisiaqalerumalluni qinnuteqaatinik sularinnittartunik massakkut pilersitsisimasoq.

Suliami tamanna tunngavigalugu annertunerusumik iliuuseqaqqissanngilanga.

Allakkat ukua assilinerat A-mut nassiuppara.

Oqaaseqaat manna oqaaseqaammi pineqartut kikkuussusii ilisarnarunnaarsillugit nittartakkanni tamanut saqqummiunneqarumaarpoq 2023-milu ukiumoortumik nalunaarutinni eqqaaneqarumaarluni.

SULIAP INGERLASIMANERATA ALLAASERINEQARNERA

A 2012-imit 2017-imut siusinaartumik pensionisiaqarsimavoq. A-p siusinaartumik pensionisianik tunineqartarunnaarnissani 15. juni 2017-imi qinnutigisimavaa.

Suliami nalunaarsuiffimmi allatamit 3. august 2018-imeersumit erserpoq A kommunip ataatsimeeqatigisimagaa, tassanilu siusinaartumik pensionisiaqalerumaluni qinnuteqaat A-p atsiorsimagaa. Suliami nalunaarsuiffimmi allanneqarsimavoq qinnuteqaat taanna napparsimmavimmut nassiunneqarsimasoq.

Suliami allagaatini ilaavoq nakorsap uppernarsaasiussaa 9. august 2018-imeersoq. Nakorsap uppernarsaasiussaanit tassannga erserpoq A gigtimik nappaateqarnini pissutigalugu aalisartutut sulisinnaanngitsoq, inuussutissarsiullu taanna kisiat pineqartup nalunngikkaa. Nakorsap uppernarsaasiussaanit aammattaaq erserpoq A-p sulisinnaassusia annikilleriarujussuarsimasoq kiisalu A taamaallaat assani atorlugit sulisinnaagunartoq.

A-p kommunimut allagaanit 16. december 2021-meersunit makku erserput:

“2018 taamanili nakorsap immersungaa qaqitsikkusullungu saaffiginnippunga. Suliaq uannut tunngasoq sumut killinnersoq siusinaarlunga aningaasaqalernissara. Nakorsap immersungaa uannut tunngasoq piaartumik qaqinnisaa piumasaraara.”

A-p kommunimut allagaanit 27. december 2021-meersunit makku erserput:

“2018-imi uannut suliaq pillungu maalaarut.

Nakorsap immersungaa siusinaarlunga qaammammoqalernissannut. Nakorsap immersungaa [illoqarfimmi] inunnik isumanginnittoqarfimmut [tunniuppara].

Sullissisinnit oqarfigineqarpunga suliaq katanneqarsimasoq, suliaq nerriviup qaavanut qaqinneqarsimannngitsoq, 2018-imi nakorsap aalajangingaa. Suliaq 2018-imi naammassineqartusaaq.

Taanna pillungu naammangittaalliorpunga.”

Suliami nalunaarsuiffimmi allatamit 27. december 2021-meersumit makku erserput:

“[A-p] allangaqaatai tinguneqarput, suliaq siusinaartumik sulisinnaajunnaarnersiuteqalernissaminut qinnuteqaatingisimasani pillugu qaqqinneqarnissaanik kissaateqartoq. Allakkat malillugit journalia misissorneqarnerani paasinarsivoq narkorsamiit oqaaseqaat tinguneqarnikuusi[ma]soq siusinaartumik sulisinnaajunnaarnersiuteqalernissamut tunngasoq. 2018-imi suliaasimangaluarpoq ingerlateqqinneqanngittoorsimasoq. Tamanna pillugu inuttaa aggersarlugu oqaloqatigineqarpoq suliaq ingerlaqqinngittoor-simanera pillugu nakorsamiit oqaaseqaat nutarterneqartariaqartoq suliaq aallaqqaataaniit suliareqqittussanngorlugu.

Tamanna pillugu 2018-[i]mi nakorsamiit oqaaseqaat pillugu qaqqinneqartariaqaraluar-nera eqqarsaatingivara maalaarutingerusullugulu, aallaqqaataaniit aallartinnissaa kisaatinginngikkaluarlugu nakorsamiit innersuunneqareerami.

Nassuiaanneqarpoq maalaartarfimmut immersungassaq immersoriarlugu ingerlateq-qissinnaangaa suliarlu maalaaruteqartarfimmiit naammassereerpat aatsaat nakorsap oqaaseqaataanik nutaamik piniarnissatsinnut piffissanngorumaartoq. Paasinnippoq, maalaartarfimmut immersueqqaarusuppoq.”

A-p piffissaq kommunip suliamik suliarinninnerminut atugaa Isumaginninnermi Naammagittaalliuuteqartarfimmut 27. december 2021-mi naammagittaalliuutigaa.

A-p piffissaq kommunip suliamik suliarinninnerminut atugaa pillugu naammagittaalliuutaata suliarineqarnissaa Isumaginninnermi Naammagittaalliuuteqartarfiup 7. januar 2022-mi itigartitsissutigaa, Isumaginninnermimi Naammagittaalliuuteqartarfik taamaallaat suliat kommunip aalajangiiffigimasaasa suliarinissaannut pisinnaatitaammat.

Suliami nalunaarsuiffimmi allatamit 3. maj 2022-meersumit makku erserput:

“[A] naammagittaalliuuteqarnikuuneranut tunngatillugu allakkat isertinneqarnikuusimasut førtidspensionimut sullissisum[i]t tinguneqarput. Taassumap iluani suliakkiissutaavoq [A] nutaatut tingullugu neqeroorfigineqassasoq siusinaartumik sulisinnaajunnaarnersiuteqalernissamut suliamik aallartitsisoqarnissaa pillugu. [A] tamanna pillugu

attaviginiartaraluarlugu iluatsi[ssi]nnaanngilara ikattoriallunga mobiiliata normuanut sianertaraluarlunga tinguneqarnerlu ajorluni, suli misilittaarneqarpoq.”

A-p kommunimut allagaanit 9. september 2022-meersunit makku erseput:

“[...]

2018-imili nakorsap oqaaseqaataa inunnik isumanginnittut ningiuta allaffianut qaammammumt siusinaarlunga aningaasaqalernissara [...] pillungu 2021. Ukioq kingulleq allaffimmi paasiniaangama imannak [akippumt] uannut tunngasoq takunngitsoorneqarsimasoq. Katanneqarsimasoq suliassaq uannut tunngasoq? [...]”

Suliami nalunaarsuiffimmi allatamit 16. september 2022-meersumit makku erseput:

“[A] siusinaartumik sulisinnaajunnaarnersiuteqalernissamut 2018-imi qinnuteqarsimagaluarnini pillugu allangaqarsimanera pillugu økonomisk fagchef isumasioreerlugu innersuussutaa malillugu aggersarneqarpoq tusarniaanissamut. [A] siusinaartumik sulisinnaajunnaarnersiuteqalernissamut qinnuteqaammik ingerlatitsissanguni piumasaqaataavoq nakorsamiit oqaaseqaat nutaajussasoq. Inuttaata saaffinginnissutaa nutaatut tinguneqassalluni. Tusarniaanissamut allakkatigut aggersarneqarpoq ulloq 22. september 202[2] kl. 13.00. Allakkat br. bud-itut apuussassanngortinneqarput.”

Suliami nalunaarsuiffimmi allatamit 11. oktober 2022-meersumit ersepuq A 22. september 2022-mi ataatsimiinnermut takussimanngitsoq.

A-p naammagittaalliuutaa ilanngussartalik e-mailikkut 4. oktober 2022-meersukkut tiguara, A-lu ilaatigut imatut allappoq:

“[...]

2018-imili nakorsap aalajangerpaa qaammammumt siusinaarlunga aningaasaqalissasunga. Nakorsap oqaaseqaataa inunnik isumanginnittoqarfimmumt apuutereersimasoq 2018-imili. Taava paasiniaavunga ukioq kingulleq 2021 decembarimi juullip qaamtaani suliaq uannut tunngasoq sumut killinnersoq. Oqarfingineqarpunga katataasimasoq. Takunngitsoorneqarsimasoq? Ilaa tupinnaq! Taamatut salloqittarlunga oqarfingineqarnera akuerisinnaanngilara. Taava Kalaallit Nunaanni inunnik isumanginnitto-

qarfimmi naammangittaalliortarfimmut naammangittaalliorama akissutai tunngavignalugit [illoqarfimmi] borgmestarimut allangaqarpunga januarip 7-iani. Allakkatingut akineqanngilannga.

Maanna Inatsisartut Ombudsmandiannut allangaqarpunga ikioqqullunga? [...] Nakorsap uppersaatai tapullungit nassiuppakka.

Allangaqaatinnulluunniit akineqanngilanga borgmestariit? Taava imannak oqarfingineqaraluarpunga inunnik isumanginninnermi allaffimmi ningiuunngittup sulisoq alla ningiuminut oqariartoqattaarpoq. Tamanna uanga akuerisinnaannginnakku aamma tamatum kingorna qaamat sinnerlungu kommunip allaffianiit telefonikkut uannut sia-neqattaaraluarput tingussanngikkinga, suliaq matoqqasoq telefonikkut suliarineqartanngimmat.

Nakorsap aaliangingaanik oqaaseqaataa 2018-imili apuutereernikoq oqarfigingineqaannarlunga inunnik isumanginnittoqarfimmi allaffimmi sulisumit oqarfingineqarnera eqqunngitsoq suliassat uannut tunngasoq katataasimasoq? Takunngitsoorneqarsimasoq?

[...]"

Sulisuma ilaata kommuni oqarasuaatikkut 11. oktober 2022-mi attaveqarfigaa. Kommunip sulisunnut oqaatigaa A siusinaartumik pensionisiaqalerumalluni 3. august 2018-imi qinnuteqarsimasoq, suliamili suli aalajangiisoqarsimanngitsoq. Kommunip aammattaq oqaatigaa kommunip siusinaartumik pensionisiaqalerumalluni qinnuteqaat A-p kommunimut 27. december 2021-mi nukingisaarinerata kingornatigut suliaralugu aallartissimagaa.

Kommuni allakkatigut 13. oktober 2022-meersutigut qinnuigaara suliami allagaatit tamaasa suliarlu pillugu oqaaseqaat uannut nassiuteqqullugit, ilaatigut imatut allallunga:

"[A-p] Avannaata Kommuniata (matuma kingornatigut kommunimik taaneqartarsap) siusinaartumik pensionisiaqalerumalluni qinnuteqaammut 3. august 2018-imeersumut atatillugu aalajangiisimannginnera uannut e-mailikkut 4. oktober 2022-meersukkut ilanngussartalikkut naammagittaalliuutigaa.

Sulisuma ilaata kommuni oqarasuaatikkut 11. oktober 2022-mi attaveqarfigaa, taasumalu oqaatigaa [A] piffissami 2012-imit 2017-imit siusinaartumik pensionisiaqarsimasoq. Kommunip oqaatigaa [A-p] siusinaartumik pensionisianik pisartagaqarunnaarnissani 15. juni 2017-imi qinnutigisimagaa, taamaattumillu siusinaartumik pensionisianik tunniussisarneq kommunip 1. juli 2017-imit unitsissimagaa.

Kommunip sulisunnut aamma oqaatigaa [A-p] siusinaartumik pensionisianik pisartagaqaleqqinnissani 3. august 2018-imi qinnutigisimagaa, tamatumunngalu peqatigitillugu nakorsap oqaaseqaataa 2018-imeersoq nassiussimagaa.

Kommunip sulisunnut aammattaq oqaatigaa 3. august 2018-imit [A-p] 27. december 2021-mi kommunimut nukingisaaruteqarnerata tungaanut suliamik suliarinninnermi iliuuseqartoqarsimagunangitsoq.

Kiisalu kommunip oqaatigaa [A] ataatsimeeqatigineqarnissaminut 22. september 2022-mi aggeqquneqarsimasoq, takkussimananili. Uanga paasisara unaavoq kommunip [A] ataatsimeeqatigineqarnissaanut aggeqqeqquniaraa, nakorsap oqaaseqaataanik nutaamik suliarinnittoqarnissaanut akuersissutaa pissarsiariniarniarlugu.

Kommuni qinnuigaara suliami allagaatit tamaasa suliarlu pillugu oqaaseqaat uannut nassiuteqqullugit.

Suliami allagaatinik tamanik oqarnermi pineqarput allagaatit suliap [A-mut] tunngasup suliarineqarnerani atugassatut tiguneqarsimasut pilersinneqarsimallu tamarmik, matumani allakkat tiguneqartut nassiunneqartullu, allakkiat (notater), nalunaarutiginninnerit nalinginnaasumillu allattukkat allat tamaasa ilanngullugit eqqarsaatigalugit.

Kommuni qinnuigaara oqaaseqaammuni [A-p] siusinaartumik pensionisiaqalerumalluni qinnuteqaataata 3. august 2018-imeersup kommunimit suli aalajangiivigineqarsimannginneranut pissutaasoq pillugu immikkut nassuiaateqaqqullugu.

[...]"

Suliami nalunaarsuiffimmi allatamit 15. november 2022-meersumit erserpoq kommunip A 22. november 2022-mi ataatsimiinnissamut aggeqqusimagaa.

A-p kommunimut allagaanit 22. november 2022-meersunit makku erserput:

“Inunnik isumanginnittoqarfimmi pisortamut allangaqarpunga. Una 090818 nakorsap oqaaseqaataa allappusi Inatsisartut Ombudsmandiannut. Nutaaminngooq oqaaseqaammik piniarpusi. Uanga taanna akerlerivara, uunga tunngaviutinneqassasoq 9.8.-18 nakorsap aaliangiinera. Tassanngaanniit suliariniarsiuk. [...]”

Suliami nalunaarsuiffimmi allatamit 24. november 2022-meersumit makku erserput:

“[A] 22. november takussimangaluartoq sulinnginnama oqaloqatingineqanngittoorpoq, kisiannili ullumikkut isertillugu oqaloqatingineqarpoq.

[A] 2018-imili nakorsap oqaaseqaataa takkunnikuungaluarluni siusinaartumik sulisinaajunnaarnersiuteqalernissamik qinnuteqaat ingerlateqqinneqanngittoornikuusimanagera paasiuminaatsippaa akuerisinnaanangulu. Taannalu atorlugu førtidspensionit aallarteqqinneqarnissaat kissaatingingaluarlugu. Inuttaali nassuiaanneqarpoq familieudvalgimut qaqqinneqassappaat nakorsap oqaaseqaataa nutaajusariaqartoq imaluunniit ukioq ataaseq sinnerlugu pisoqaassuseqassanngittoq. Taamaattumik paasinnilluni atsiarpoq nakorsap oqaaseqaataanik pissarsiniarnissatsinnut, takkuteriarpat takuneqarsinnaaneruniassammat 2018-imi nakorsap oqaaseqaataa allannguuteqarsimanersoq.

Ilanngullugit eqqartorpai naammagittaalliorluni allangaqaatingisartakkani allakkatigut akineqarneq ajormata aamma taanna nuannarinagu inuttut naleqassutsiminut kallaammata.

Ombudsmandimiit allakkat tingusimasani kopeertippai, taakkulu fagchefitsinnut ingerlateqqinneqarput aammalu allangaqaatai.

Inuttaa ilisimatinneqarpoq uterfingineqassasoq aammalu nakorsap oqaaseqaataanik utaqqinerput sivilaarsinnaasoq. Ajorinngilaa utaqqinissani.”

Nakorsap paasissutissiissutaanik siusinaartumik pensionisiaqalerumalluni qinnuteqaatip suliarineqarnerani atugassanik kommunip pissarsiniarsinnaanera A-p 24. november 2022-mi akueraa.

Suliami nalunaarsuiffimmi allatamit 28. november 2022-meersumit makku erserput:

“[A] aggersarneqarluni takkupperoq. Siusinaartumik pensionisiaqalernissamut qinnuteqaataasimasoq 2018-imut tunngassuteqartoq, suliap uninngasimanera aammalu nakorsap oqaaseqaataa taamanili tiguneqarsimasoq aallaavigalugu Ombudsmandimut ingerlasimasoq pillugu saaffiginnissuteqarmat, nassuiaaffiginiarlugu aammalu siusinaartumik pensionisiaqalernissamut suliap ingerlanissaa pillugu oqaloqatigineqarnissaa piniassammat aggersarneqarnikuvoq. Siusinnaartumik pensionisiaqalernissamut qinnuteqarnerani nakorsap oqaaseqaataa piniarneqarsimasoq takkussimasorlu 2018-imi ingerlateqqinneqanngitsoorsimanera ajuusaarutigineqarpoq, aammalu nassuiaallugu suliap ingerlaqqinngitsoorsimanera sumik tunngaveqarnerisooq, tamannalu ajuusaarnartuusoq erseqqissaavigineqarluni. [A] nassuiaavoq ingerlateqqinneqanngitsoorsimanera namminerminut qanoq sunniuteqarsimanera eqqartorpaa, tamatuminnalugu paasisinnaallugu ajuusaarnartuusoq paasitinneqarluni. Taamaattorli suliap ingerlateqqinneqarnissaanut suliap aallarteqqinnissaa pingaaruteqarmat suleriutsumik aammalu inatsisit qanoq allassimanerannik nassuiaanneqarpoq. Sulisinnaassutsimik qulaajaaneq pisimasussaammat aammalu tullertut qanoq ingerlasoqarnissaanik ilitsersuunneqarluni. Nakorsap oqaaseqaataa taamanikkut pineqarsimasoq atorsinnaannginneranut tunngavilersuutigineqarpoq maannakkut peqqissutsimigut inissisimanera aallaavigalugu sulisinnaassutsimik qulaajaaneq ingerlanneqartussaammat, taamaattumik nutaamik piniartoqarnissaa innersuussutigineqarsimasoq. Tamanna paasilluarppaa, aammalu kingullermik isersimanermini paasisimallugu nassuiaateqarluni. Taamaattumik paasisinnaavaa qujarullugulu suliap ingerlaqqilernerani, aammalu inatsisip qanoq imaqarneranik nassuiaasoqarneranut qujavoq, apeqquteqaatigalugulu sulia aalisarsinnaangami affaanik siusinaartumik pensionisiaqalersinnaanerluni, affaanillu aalisarsinnaanerluni. Maanna killiffini aallaavigalugu tamakkiisumik aalisarsinnaajunnaariartorinini aallaavigalugu. Nassuiaanneqarpoq sulisinnaassutsimik misissuinerup takutikkumaaraa qanoq inissikkumaarneranik. Maannalu aningaasatigut killiffini naapertorlugu pisinnaatitaaffinnut tunngatillugu qanoq periarfissaqarnerluni paasiniaavoq, taannalu aallaavigalugu naatsorsuusiutissinnaasut erseqqissaavigineqarami qujavoq. Paasinilluarlunilu. [A] iserami naammagittaalliutaanut tunngatillugu isertitanut nalunaarsiat piumaneqarnikkuupput, Ombudsmandimut suliaakkiutigineqarsimasoq aallaavigalugu paasissutissanik piniarneq toqqammavigalugu, taakkualu nassarpai. Erseqqissaavigineqarpoq sumut atortussaannersut paasinnillunilu nassarmagit juristimut ingerlateqqinneqarput. Qujavoq suliap ingerlaqqilerneranut.”

Kommunip oqaaseqaataa e-mailikkut 29. november 2022-mi tiguara. Kommuni ilaatigut imatut allappoq:

“[...]”

[A-p] Ombudsmandimut saaffiginnissimanera pillugu suliamut atatillugu Ombudsmandi 13. oktober 2022-mi Avannaata Kommunionut saaffiginnippoq.

Ombudsmandip Avannaata Kommunionut oqaatigaa [A] siusinaartumik pensionisianik qinnuteqaatimi 3. august 2018-imeersup aalajangiiffigineqarsimanginnera pillugu Avannaata Kommunia 4. oktober 2022-mi Ombudsmandimut naammagittaalliutigisimagaa.

Tamatuma kingornatigut suliap ingerlasimanera pillugu paasissutissat Avannaata Kommunioni sulisumik oqaloqateqarnikkut pissarsiarineqartut Ombudsmandip allakkamini 13. oktober 2022-meersuni innersuussutigai.

Paasissutissat innersuussutigineqartut Avannaata Kommunionit uppernarsarneqartut.

Avannaata Kommuniata oqaatigisinnaavaa [A-p] siusinaartumik pensionisianik qinnuteqaammunik tunniussinerata kingornatigut kommuni piffissami sivisunerusumi sulusaaleqingaatsiarsimasoq, soorluttaaq immikkoortortaqarfimmi, qinnuteqaatip taamani sumiiffigisaani, piffissap ilaani pisortamik atorfinitsitsisoqarsinnaasimangitsoq.

Avannaata Kommuniata siusinaartumik pensionisiat pillugit suliat suliarineqartarnerat piffissami aalajangersimasumi Majoriamut aammattaaq nuussimavaa, taamaaliornikkut sulianik ingerlatsinerup ingerlalluarnerunissaa kommunip neriuutigalugu. Taamaattoqangimmalli sulianik ingerlatsinermik akisussaaffik kommunip nammineq allaffianut utertinneqarpoq.

Suliaq [A-mut] tunngasoq tassunga atatillugu takunngitsoorneqarsimassasoq Avannaata Kommuniata ilimagaa. Pissutaaqqissaartulli suussusersinissaanut periarfissaqarsimangilaq.

Avannaata Kommunia suleqatigiissitamik immikkut ilisimasalinnik inuttalimmik maanna pilersitsisimalerpoq, sulianik siusinaartumik pensionisianut, tamatumani nalileeqqinnerit ilanngullugit eqqarsaatigalugit, tunngassutilinnik suliaqartumik.

[A-p] qinnuteqaataata piffissami sivisunerusumi suliarineqarsimanginnera Avannaata Kommuniata sakkortunerpaamik ajuusaarutigissavaa.

Avannaata Kommuniata suliaq maanna suliaraa.

Ombudsmandip allagaani 13. oktober 2022-meersuni takuneqarsinnaasutut A 22. september 2022-mi ataatsimeeqatigiinnissamut aggersarneqarsimavoq, takkunnanili.

Nakorsamit oqaaseqaammik nutaamik pissarsiniarnissaq siunertaralugu 24. november 2022-mi ataatsimeeqatigiinnissamut aggersarneqaqqippoq, tamatumunngalu akuersilluni.

[A] aammattaaq 28. november 2022-mi oqaloqatigiinnissamut aggersarneqarpoq, tamatumani siusinaartumik pensionisiat pillugit Inatsisartut inatsisaaat nr. 40, 9. december 2015-imeersoq kingusinnerusukkut allannguuteqartinneqartoq naapertorlugu suliami qanoq alloriartoqaqqinnissaa pillugu ilisimatinneqarluni. Ukiuni kingullermi pingasuni inaarummik naatsorsuutinik nassaqquneqarsimavoq. Tamatumunnga taarsiullugu siumoortumik naatsorsukkat, suliami allattukkanut suliamilu ilanngussanut allanut ilanngullugit nassiunneqartut, nassarpai. Pissutsit taamaannerat paasilluarpaa suliallu ingerlateqqinnissaani suleqataanissamut piareersimalluni. Innuttaasup sulisinnaassusia maanna misissorneqassaaq suliamilu ingerlariaqqinnissamut pisariaqartinneqartut suliarineqassallutik.

Suliap maannamut ajusaarnartumik arriitsorujussuarmillu ingerlasimanera Avannaata Kommuniata ajuusaarutigeqqippaa." (Ombudsmandeqarfimmi nutsigaavoq)

Sulisuma ilaata suliami allagaatit nassiuteqqullugit kommunimut 1. december 2022-mi nukingisaarutigaa, taakkulu ulloq taanna kingusinnerusukkut tiguakka.

Suliami allagaatini ilaavoq nakorsap uppernarsaasiussaa 8. december 2022-meersoq. Nakorsap uppernarsaasiussaanit makku aammattaaq erserput:

"Allaat isumaqarpunga [A] siusinaartumik pensionisiaqalerumalluni 2018-imi qinnuteqaateqarami ima iloqissereersimatigisoq taamanili siusinaartumik pensioniaqalersinnaasimagaluarluni. Nakorsap taamani uppernarsaasiussaani nakorsap tamanna aamma oqaatigisimagaa takusinnaavara. Massakut aalisartutut sulineq eqqarsaatigalugu suli ajorseriaannarsimavoq, [...-llu] nappaatiminit ima iloqisserneqarsimatigisoq nallivunga [...] periarfissaangitsoq." (Ombudsmandeqarfimmi nutsigaavoq)

Suliami allagaatinit erserpoq A siusinaartumik pensionisiaqalerumalluni 15. december 2022-mi qinnuteqaqqissimasoq. A-p qinnuteqaateqarnermi immersugasami oqaatigisimavaa anniaraluarluni sulisarsimalluni, inuussutissaqarumalluni.

Suliami nalunaarsuiffimmi allatamit 3. januar 2023-meersumit erserpoq A kommunip ataatsimeeqatigisimagaa, sulisinnaassuseqarneranullu takussutissiaq tassani suliarineqarsimasoq.

Kommuni 19. januar 2023-mi qinnuigaara suliaq pillugu ilassutaasumik oqaaseqaateqaqqullugu, ilaatigut makku oqaatigalugit:

“[...]”

1. [A] uannut naammagittaalliummini oqaatigaa siusinaartumik pensionisiaqalerumalluni 2018-imi qinnuteqaateqarsimalluni, ulluali erseqqinnerusumik taanagu.

Suliami allattuiffimmi allattukkanit kommunip uannut nassiussaanit erserpoq [A-p] qinnuteqaataa kommunip 31. juli 2018-imi tigusimagaa. Tiguneqartoq taanna siusinaartumik pensionisiaqalerumalluni qinnuteqaataanersoq pisartakkanilluunniit allanik qinnuteqaataanersoq suliami allattuiffimmi allatami takuneqarsinnaanngilaq. Oqaatigineqarporli qinnuteqaat 3. august 2018-imi ataatsimiinnermi ilanngullugu oqaluuserineqarumaartoq [A-mut] ilisimatitsissutigineqarsimasoq.

Suliami allattuiffimmi allatanit aammattaaq erserpoq kommunip [A] 3. august 2018-imi ataatsimeeqatigisimagaa, taannalu siusinaartumik pensionisianik qinnuteqaateqarniarnini uppersarsarlugu atsiortinneqarsimasoq. Suliami allattuiffimmi allanneqarsimavoq siusinaartumik pensionisiaqalerumalluni qinnuteqaat napparsimmavimmut nassiunneqarsimasoq.

Kommunip sulisuma ilaannik oqarasuaatikkut 11. oktober 2022-mi oqaloqateqarnermini oqaatigaa [A] siusinaartumik pensionisiaqalerumalluni 3. august 2018-imi qinnuteqaateqarsimasoq. Tamanna kommunip oqaaseqaammuni 29. november 2022-meersumi uppersarsarpaa.

Kommuni qinnuigaara [A] siusinaartumik pensionisiaqalerumalluni 31. juli 2018-imi imaluunniit 3. august 2018-imi qinnuteqaateqarsimanersoq paasissutissiissutigeqqullugu.

2. Kommuni qinnuigaara [A-p] siusinaartumik pensionisiaqalerumalluni qinnuteqaataanut atatillugu suliami iliuuserisimasami ullui tulleriarlugit takussutissiaq suliareqqullugu.

3. Kommuni qinnuigaara siusinaartumik pensionisiat eqqarsaatigalugit [A-mut] qaqugu aalajangiinissani naatsorsuutiginerini paasissutissiissutigeqqullugu.

4. Kommuni qinnuigaara [A-p] siusinaartumik pensionisiaqalerumalluni qinnuteqaataa tunngavigalugu sulianik suliarinninnerup suli aallartinneqarsimanginnera kommunip qanga paasisimaneraa paasissutissiissutigeqqullugu.

5. Suliami allattuiffimmi allatanit erserpoq siusinaartumik pensionisiaqalerumalluni qinnuteqaat kommunip 24. oktober 2019-imi tigusimagaa.

Kommuni qinnuigaara kommuni tamanna tunngavigalugu qanoq iliuuseqarsimanersoq paasissutissiissutigeqqullugu.

6. [A-p] assammik allallugit allagaanit 16. december 2021-meersunit erserpoq siusinaartumik pensionisiaqalerumalluni qinnuteqaatimi killiffia paasissutissiissutigeqqugaa.

Kommuni qinnuigaara saaffiginnissut taanna tunngavigalugu qanoq iliuuseqarsimanini paasissutissiissutigeqqullugu.

7. Kommunip uannut oqaaseqaataa 29. november 2022-meersoq tunngavigalugu paasisara unaavoq [A-p] siusinaartumik pensionisiaqalerumalluni qinnuteqaataa kommunip piffissap sivilunerusup ingerlanerani suliarisimangikkaa.

Kommuni qinnuigaara [A-p] suliamik piffissami siviluallaami suliarinninneq pissutigalugu taarsiivigineqarnissaminut periarfissaqarnera isummerfigisimanerlugu paasissutissiissutigeqqullugu.

[A-p] taarsiivigineqarnissaminut periarfissaqarnera kommunip isummerfigisimangippagu kommuni qinnuigaara manna pillugu nassuiaateqaqqullugu, tassalu kommunip naliliinera unaanersoq [A] suliamik piffissami siviluallaami suliarinninneq pissutigalugu taarsiivigineqarnissaminut pisinnaatitaaffeqartoq.

Siusinaartumik pensionisiat pillugit inatsit pillugu ilitsersuut Isumaginninnermut, Suliffeqarnermut Nunamullu Namminermt Tunngasunut Naalakkersuisoqarfiup ataani Naalakkersuisut nittartagaanni www.naalakkersuisut.gl-imi atuarneqarsinnaasoq tamatumunnga atatillugu innersuussutigaara, tassanngalu erserpoq piffissaq suliamik suliarinninnermut atorneqartoq naammaginartumik sivilissuseqartutut isigineqartoq annertuumik qaangerneqarpat tamatuma kommunalbestyrelsi inatsiseqartitsinermik unioqqutitsilluni iliuseqarsimanersoq immaqalu taarsiissuteqarnissamut akisussaatinneqarsinnaanersoq apeqqutaalersissinnaasaraa.

8. Kommuni allakkanni 1. november 2022-meersuni qinnuigaara suliami allagaatit tamaasa uannut nassuteqqullugit. Suliami allattuiffimmi allattukkat arlallit, allakkat assammik allatat, Isumaginninnermi Naammagittaalliuteqartarfimmut naammagittaalliornermi immersugassaq immersorneqarsimasoq nakorsarlu paasissutisseeqqullugu qinnutigisaaq 24. november 2022-meersoq 1. december 2022-mi tiguakka.

[A-p] siusinaartumik pensionisiaqalerumalluni qinnuteqaateqqaava, allagaat [A-p] 3. august 2018-imi atsiugaa, allakkat allagaatilluunniit allat tigungilakka.

Kommuni qinnuigaara suliami allagaatit tamaasa uannut nassiussimanerlugit misissoqqullugu.

Suliami allagaatinik tamanik oqarnermi pineqarput allagaatit suliap [A-p] siusinaartumik pensionisiaqalerumalluni qinnuteqaataanut tunngasup suliarineqarnerani tiguneqarsimasut pilersinneqarsimasullu tamarmik, matumani allakkat tiguneqartut nassiunneqartullu, allakkiat (notater), nalunaarutiginninnerit nalinginnaasumillu allattukkat allat tamaasa ilanngullugit eqqarsaatigalugit.

Kommuni suliami allagaatinik uannut nassiunneqarsimangitsunik malugisaqarpat kommuni qinnuigaara taakku kommunip oqaaseqaataanik ilaqartillugit uannut nassuteqqullugit.

[...]"

Suliami nalunaarsuiffimmi allatamit 19. januar 2023-meersumit makku erserput:

"Siusinaartumik pensionealernissamik qinnuteqaataa SUL-imi ataatsimiinnermi 18. januar 2023 oqaluuserineqarpoq. Qinnuteqartoq aalisartuunerminut licenseqarpoq, oqarfigineqarnikuusimallunilu sionatigut kinaagaluarnersumit affarmik pensioneqarlu-

ni affarmik aalisartuusinnaasoq. Majoriamullu ikaarsaartinneqarnissaminut piumasi-manani suleqatiginiarnera oqimaassimalluni.

SUL-imi aaliangiunneqarpoq sullissisua aqutsisorlu peqatigalugit inuttaata naapeq-qaarneqarnissaa, taamaammallu suliaq isumaginnittoqarfimmiiginnarallassasoq.”

Suliami nalunaarsuiffimmi allatamit 26. januar 2023-meersumit makku erserput:

“[A] siusinaartumik pensioneqarniarluni qinnuteqartuuvoq, taamaattorli ressource-profilimik immersueqatigineqarnissaanut aggersarnikuunerani oqaloqatigineranilu as-sut ingerlaannaq pensioneqalerusukkami kiisalu 50-50 perusukkaluaramiuk, soorlu 50 % licen[s]. Taamatullu ilisoqarsinnaanngittoq nassuiaaffigeqqinnissaanut aggersar-neqarpoq. Pisortaniik ikiorsiissutinik sullissisoq peqatigalugu oqaloqatiginera ingerla-voq kiisalu malitagut aallaavigalugit takussutaasinnaasut takutinneqarput, inatsillu malitarput ilanngullugu takutillugu.

Inuttaa paasinnippoq, kiisalu nalornivoq qanoq ingerlariaqqissanerluni, periarfissippa-rali februar qiteqqunnerata missaanut eqqaarsaatigeqqissinnaagaa qanoq ingerlariaq-qissanersugut.

[...]”

Kommunip oqaaseqaat 29. november 2022-meersoq suliamilu allagaatit uannut 1. december 2022-mi nassiuteriikkani 31. januar 2023-mi nassiateqqippai.

Oqaaseqaatip suliamilu allagaatit nassiunneqartunut apeqqutinut allakkanni 19. januar 2023-meersuni apeqqutigisannut akissutaannginnerat kommunimut e-mailikkut 2. december 2022-meersukkut malugeqqullugu oqaatigaara.

Kommunip ilassutaasumik oqaaseqaataa 21. februar 2023-mi tiguara. Kommuni imatut allappoq:

“Inatsisartut Ombudsmandiata suliaq [A-p] siusinaartumik pensionisiat pillugit saaffi-ginnissutigisimasaa Avannaata Kommunianut 13. oktober 2022-mi saaffiginnissutigaa.

Avannaata Kommunian suliaq pillugu 29. november 2022-mi oqaaseqaateqarpoq.

Suliami allagaatit Avannaata Kommuniata Ombudsmandimut 1. december 2022-mi nassiuppai.

Ombudsmandip ilassutitut oqaaseqaateqartoqarnissaa allakkatigut 19. januar 2023-meersutigut qinnutigaa, immikkoortullu arfineq pingasut kommunimut isummerfigeqqusani saqqummiullugit.

[A-p] Ombudsmandimut saaffiginninnermini oqaatigisimavaa siusinaartumik pensionisiaqalerumalluni 3. august 2018-imi qinnuteqarsimalluni. [A] siusinaartumik pensionisiaqalerumalluni 3. august 2018-imi qinnuteqaateqarsimasoq kommunip siusinnerusukkut taamatutaaq oqaatigisimavaa. Ombudsmandip allakkani 19. januar 2023-meersuni oqaatigaa suliami allattuiffimmi 31. juli 2018-imeersumi qinnuteqaat oqaatigineqarsimasoq. Taamaattumik Ombudsmandip makku qinnutigai:

1. Kommuni qinnuigaara [A] siusinaartumik pensionisiaqalerumalluni 31. juli 2018-imi imaluunniit 3. august 2018-imi qinnuteqaateqarsimanersoq paasissutissiisutigeqqullugu.

1 pillugu: Suliami allattuiffik oqaatigineqartoq pisortanit ikiorsiissutinik suliasaqarfimmi allanneqarsimavoq, pisortanillu ikiorsiissutinik qinnuteqaammut tunngasuulluni. Qinnuteqaatitaa immini ilanngussartaqanngitsoq siusinnerusukkut ilanngullugu nassinneqarsimanngilaq, siusinaartumik pensionisianut tunngasuunani pisortanit ikiorsiissutinut tunngasuummat. Ilanngussaq taanna massakkut ilanngullugu nassinneqarpoq.

Taamaattumik ulloq [A-p] siusinaartumik pensionisiaqalerumalluni qinnuteqarfia tassaavoq 3. august 2018.

2. Kommuni qinnuigaara [A-p] siusinaartumik pensionisiaqalerumalluni qinnuteqaataanut atatillugu suliami iliuuserisimasami ullui tulleriarlugit takussutissiaq suliareqqullugu.

2 pillugu: Piffissap ingerlasimaneranut takussutissiaq eqqarsaatigalugu suliami allattuiffiit Avannaata Kommuniata innersuussutigisariaqarpai, suliamimi iliuuserineqartut ataasiakkaat ullui taakkunani takuneqarsinnaammata. Kommuni takussutissiamik erseqqinnerusumik suliarinnissinnaasorinngilaq.

3. Kommuni qinnuigaara siusinaartumik pensionisiat eqqarsaatigalugit [A-mut] qaqugu aalajangiinissani naatsorsuutiginerini paasissutissiisutigeqqullugu.

3 pillugu: [A-p] siusinaartumik pensionisiaqalersinneqarnissaa eqqarsaatigalugu aalajangisoqarnissaata qaqugu pinissaa Avannaata Kommuniata massakkut ajoraluurtumik paasissutissiissutigisinnaangilaa.

Nassiussinerup kingulliup kingornatigut suliami allattuiffiup naqitanngortinneqarnera kiisalu suliami allattuiffimmi ilanngussat taaneqartut Avannaata Kommuniata kakkiullugit nassiuppai. Tassannga ersertutut suliaq kommunip ingerlaavartumik suliaraa, suliamillu suliarinninneq inatsimmi piumasarineqartutut ingerlallugu. Oqaatigineqassaaq [A] – 2012-imit 2017-imut – siusinaartumik pensionisiaqareersimagaluartoq nalileeqqittoqartussaasoq, siusinnerusukkummi nalileeqqittoqarsimanngimmat, inatsisimmi atuutilernerani suli 60-inik ukioqalersimanngimmat, tak. siusinaartumik pensionisiat pillugit Inatsisartut inatsisaanni nr. 40-mi, 9. december 2015-imeersumi kingusinnerusukkut allannguuteqartinneqarsimasumi § 43.

4. Kommuni qinnuigaara A[-p] siusinaartumik pensionisiaqalerumalluni qinnuteqaataa tunngavigalugu sulianik suliarinninnerup suli aallartinneqarsimannginnera kommunip qanga paasisimaneraa paasissutissiissutigeqqullugu.

4 pillugu: Qulaani taaneqartunut atatillugu makku paasissutissiissutigineqarput: "Ukiut marluk qaangiunneranni, tassalu 16. december 2021-mi, [A] siusinaartumik pensionisiat pillugu isumaginninnermik ingerlatsivimmut allappoq, suliarlu apeqqutigalugu. Suliaq suliamik suliarinnittup misissorsimagaluarpa [A-lu] ataatsimiigiaqqusimagaluarlugu, suliamillu suliarinnittup [A] nalunaarfigisimavaa suliaq suliarineqarsimanngitsoq, aallaqqaataaniillu aallartittariaqarluni, nakorsallu uppernarsaasiussaa nutaaq qinnutiginarlugu. [A-li] aallaqqaataaniit aallarteqqikkumangilaq, nakorsammi uppernarsaasiussaq 2018-imili nassiussimammagu, [A-llu] siusinaartumik pensionisiaqalersinneqarnissaa kaammattuutigisimallugu. Suliamik suliarinnittup [A] ilitersorlugu oqarfigisimavaa piffissaq suliamik suliarinninnermut atorneqartoq sivisooq pillugu naammagittaalliut Naammagittaalliuteqartarfimmut nassiussinnaagaa, kaammattuutigalugulu nakorsap uppernarsaasiussaani nutaamik pissasugut, siullermi pisoqaammat. [A-lli] suliamik suliarinnittoq suleqatigiumangilaa. Mobilini tiguneq ajorpaa, aggeqquneqaraangamilu aggissanani."

5. Suliami allattuiffimmi allatanit erserpoq siusinaartumik pensionisiaqalerumalluni qinnuteqaat kommunip 24. oktober 2019-imi tigusimagaa. Kommuni qinnuigaara kommunip tamanna tunngavigalugu qanoq iliuuseqarsimanersoq paasissutissiissutigeqqullugu.

5 pillugu: Avannaata Kommunια siusinaartumik pensionisiaqalerumalluni qinnuteqaammik 24. oktober 2019-imi tigusaqarsimanngilaq. Suliami allattuiffimmut 24. oktober 2019-imeersumut kakkiussamit ersertutut suliami allagaatit pisoqaanerit kisimik pigineqarput. Tamatumunnga atatillugu siusinaartumik pensioninut atatillugu suliamik suliarinninnermi iliuutsinik aallartitsisoqarsimanngitsoq takuneqarsinnaavoq.

6. [A-p] assammik allallugit allagaanit 16. december 2021-meersunit erserpoq siusinaartumik pensionisiaqalerumalluni qinnuteqaatimi killiffia paasissutississutigeqqugaa. Kommuni qinnuigaara saaffiginnissut taanna tunngavigalugu qanoq iliuuseqarsimanini paasissutissiissutigeqqullugu.

6 pillugu: Qulaani 4-mi 5-imilu oqaatigineqartut kiisalu kommunip allagaani 29. november 2022-meersuni oqaatigineqartut innersuussutigineqarput.

7. Kommunip uannut oqaaseqaataa 29. november 2022-meersoq tunngavigalugu paasisara unaavoq [A-p] siusinaartumik pensionisiaqalerumalluni qinnuteqaataa kommunip piffissap sivilunerusup ingerlanerani suliarisimanngikkaa.

Kommuni qinnuigaara [A-p] suliamik piffissami sivisuallaami suliarinninneq pissutigalugu taarsiivigineqarnissaminut periarfissaqarnera isummerfigisimanerlugu paasissutissiissutigeqqullugu.

[A-p] taarsiivigineqarnissaminut periarfissaqarnera kommunip isummerfigisimanngippagu kommunip qinnuigaara manna pillugu nassuiaateqaqqullugu, tassalu kommunip naliliinera unaanersoq [A] suliamik piffissami sivisuallaami suliarinninneq pissutigalugu taarsiivigineqarnissaminut pisinnaatitaaffeqartoq.

Siusinaartumik pensionisiat pillugit inatsit pillugu ilitsersuut Isumaginninnermut, Suliffeqarnermut Nunamullu Namminermt Tunngasunut Naalakkersuisoqarfiup ataani Naalakkersuisut nittartagaanni www.naalakkersuisut.gl-imi atuarneqarsinnaasoq tamatumunnga atatillugu innersuussutigaa, tassanngalu erserpoq piffissaq suliamik suliarinninnermut atorneqartoq naammaginatumik sivilussuseqartutut isigineqartoq annertuumik qaangerneqarpat tamatuma kommunalbestyrelsi inatsiseqartitsinermik unioqqutitsilluni iliuuseqarsimanersoq immaqalu taarsiissutegarnissamut akisussaatinneqarsinnaanersoq apeqqutaalersissinnaasaraa.

7 pillugu: Piffissap suliamik suliarinninnermut atorneqartup sivisuallaartup taarsiissuteqarnissamut akisussaatinneqarneq nassatarisinnaagaa Avannaata Kommuniata eqqumaffigaa. Avannaataali Kommunian isumaqarpoq siusinaartumik pensionisiaqalersit-sisoqarnissaanik aatsaat aalajangiisoqareeraangat, matumani pensionisiaqalersitsoqarnersooq, taamaappallu aningaasartat ikinnerpaafiinik, akunnattortaanik amerlanerpaaffiinilluunnit tunniunnissannut tunngavissaqarnersooq naliliineq ilanngullugu eqqarsaatigalugu, taarsiissuteqartoqassanersooq qanorlu amerlatigisunik taarsiissuteqartoqassanersooq naliliisoqarsinnaasussaasooq, tassami pissutsit suliamut attuumassuteqartut tamarmik ilanngunneqartariaqarmata, piffissaq ingerlasimasooq kisiat pinnagu, aammali ass. pineqartup suliamik paasissutissartalersuinermi arlaleriarluni peqataajumasimannginnera ilanngunneqartariaqarluni, taamatuttaarlu pineqartup piffissami ingerlasimasumi isertitai ilanngunneqartariaqarlutik.

8. Kommuni allakkanni 1. november 2022-meersuni qinnuigaara suliami allagaatit tamaasa uannut nassuteqqullugit. Suliami allattuiffimmi allattukkat arlallit, allakkat assammik allatat, Isumaginninnermi Naammagittaalliuuteqartarfimmut naammagittaalliornermi immersugassaq immersorneqarsimasooq nakorsarlu paasissutisseeqqullugu qinnutigisaaq 24. november 2022-meersooq 1. december 2022-mi tiguakka.

[A-p] siusinaartumik pensionisiaqalerumalluni qinnuteqaateqqaava, allagaat [A-p] 3. august 2018-imi atsiugaa, allakkat allagaatilluunniit allat tiguungilakka.

Kommuni qinnuigaara suliami allagaatit tamaasa uannut nassiusmanerlugit misissoqqullugu.

8 pillugu: Suliami allagaatit Avannaata Kommuniata massakkut misissoqqereerpai, ilanngussallu assigiinngitsut kakkiullugit. Oqaatigineqassaaq ilanngussat pisortanut ikiorsiissutinuinnaq tunngasut ilanngullugit nassiunneqanngimmata." (Ombudsmandeqarfimmi nutsigaavoq)

Suliami allagaatit kommunip oqaaseqaammi 21. februar 2023-meersumi inner-suussutigisaasa assilineri 2. marts 2023-mi tiguakka.

A-p kommunimut allagaanit 16. marts 2023-meersunit makku erserput:

"1) Inunnut isumanginnittoqarfimmut allangaq pisortamut

2) Siullermik 2018-imili nakorsap oqaaseqaataa ilissinnut apuummalli suliariumanangu uninngatinnikuuarsi!

3) Inuttut sumiissuseq aallaavingalungu [illoqarfimmi tassanimiuunnginnama] inuttut immikkoortillunga!

4) Sullikkumananga aatsaat nutaaq una nakorsap oqaaseqaataanik peqqillusi suliarisuusaarparsi?

5) Imatut eqqunngitsorsuarmik inunnut isumanginnittoqarfimmi sulisumiik [aperineqarpugut] nuliallu angerlarsimaffissinni imingassartortarpisi? Ilaa tupinnaq. Apeqqutaa imatut paasillungu imertaruma qaammammussannik tuniniarnanga?

6) Pisinnaatitaaffiarlunga? Oqaloqatingalunga inuttut pisinnaatitaaffiarlunga? Pisuullunga?

7) Aamma aalisartuuvunga, 2023 licens tunisinnermut allangartaq tingunikuuara. Siusinaarlunga suli qaammammoqalinnginnama, taanna aamma piniarsarissuarsi? Aatsaat 2023 naappat utertissinnaavara.

8) 50/50 siusinaarlutik kikkut tamarmik sulipput tamaani inuit naapitakka siusinaarlutik qaammammullit oqaluttuuppaannga. Eqqunngitsumik pineqarnera akuerinngilara. Taanna unitsillungu inunnut isumagininnermut pisortaamut allappunga.
[...]

9) Timikkut ajoquteqarneq pissutingalungu allannerluttarpunga, utoqqatseraluarpunga.”

Kommunip oqaaseqaataa 29. november 2022-meersoq aamma 21. februar 2023-meersoq A-mut tusarniaatigalugit 27. marts 2023-mi nassiuppakka.

A-p uannut allakkani 19. april 2023-meersuni makku oqaatigai:

“1) Taanna apeqqutingisamik uannut suliaq siusinaartumik pensioneqalernissamut tunngasoq unitsillungu nalunaarutingivara ulloq 16. marts 2023.

2) Inuttut pisinnaatitaaffinnik piaavingineqarlunga. Aatsaat soorlu licens tunisineranut allangartaq qaleralinniarnernut allangartara una erseqqisaatingilara licens. Allangartara peqanillunga sulisuni pisortap oqarfingisimavaat sulilu ataatsimiititaliami aaliangiiffingineqanngitsoq? Sooq peerneqassava? Tunisineranut allangartara 2023 tingo-reeringa?

3) Aamma sulisup oqarfingivaanga angerlarsimaffitsinni nuliaralu uangalu imingassartortarpisi? Sunaaffa taamak oqarfingisassarinanga!

4) Ilassutitut uannut inunnut isumanginnittoqarfimmi sulisuniik taamak eqqunngitsumik oqaluffingiteqattaarneq assut imatut paasillungu uanga inuttut immikkoorteqqallunga sullinniarsarivaanga. Aamma una allakkusuppara 2018-imili nakorsap oqaaseqaataa apuummagu. Suliamut allamut nuulaarlunga allappunga nakorsap oqaaseqaataa siulleq, oqaraanni nakorsap aaliangingaa, akerlerivaat. Ilaa tupinnaq?

5) Eqqunngitsumik naammagittaalliorfissannik tunillunga inunnut isumanginnittoqarfimmi pisortap allaffimmiuatalu.

6) 2018-imi tunngatillungu taarsiivingineqarnissamik 4 miliuuninik, 4.000.000 kr., taarsiivingineqarnissara aaliangiukkinga.

7) [Illoqarfimmi] inunnut isumannginnittoqarfik uannut taarsiissasoq piaartumik Inatsisartut Ombudsmandiat uannut illersuissasoq.

8) Suliaq piaartumik naammassineqassasoq piumasarivara.

[...]"

A-p sulisuma ilaannit oqarasuaatikku 4. maj 2023-mi oqaloqatigineqarnermini oqaatigaa siusinaartumik pensionisiaqalerumalluni qinnuteqaatini tunuartikka-luarini naammagittaalliutiminik suliarinnineq ingerlatiinnassagiga kissaatigigini.